

EPHIRO EVAHERIWE NI MULUKU WA NHIKU NLA



...okathi vakhani paahi nuuramihaka muru ahu.

Tith'ihu a Wirimu, hiyo ninnooxukhuruni mwaha wa Yesu Kristu, anatiri Awe aalupale Owo onivanhe awe. Ninnooxukhuruni Nyuwo mwaha wa itthu iya sothene. Ninniwehererya vancipale nno epooma ela eriyari y'aKristu ala ooreera murima. Ninniwehererya omoona Owo weetteetta eriyari ahu ooniheryaka mukhalelo Awe, aavahaka atthu waamini, owuupuxerihaka waamini. Nlo ti niwoko nahu n'okhala va, Tithi. Noosuwela wira ninoowerya woororomelani Nyuwo. Khaninrowa okhala oovirikanyiwa. Maana ninvekela mwa Nsina Nawe. Amen.

Mukilaathiki.

Kaahitteeliwa murima saana voosiis'ula olya yoolya ela ya voosiisu ni nikhuru nla nooreera n'arumeyi opooma nno. Ni siiso hiyo...Kinoona wira a—axinna aakaravari akhala mutthu onthuna. Okathi xeeni w'opatthana naarinahu. Nto vano, ohiy'ula ohiyu ahu waneili, nikelalaka ohoolo vooreera. Tivo vano, hiyo ninniroromela wira Apwiya animooreerihani vanci-ene ni vaalupale nyuwo othene.

Kookupali wira kininweha mpatthani aka ooreera murima, Muhano Upshaw, okilaanthe va, Munna Upshaw muthiyana. Apwiya yooreeriheni. Kinnimuupuwela Munna Willie Upshaw. Kaahaakhela ewarakha awe nihiku nlo ni elatarato ya Munna Willie, Teputaatu. Tivo, owo—owo aahikhala oorakala mwa miyaakha soophiyaka miloko mithanu na mosa ni mithanu na mosa.

Kaari vamuthukumanoni ohiyu omosa, kikkhalana yoowoona ya yoowo, okilaanthe, aviraviraka vamuthukumanoni, ni ekasako awe, uuramaka. Owo aarookhala vakhaterani ya iroota ni attootto, ntoko nyuwo othene mwaamusuwelanyu, nto Pwiya Yesu khunvoniha ohiyu yoowo. Ni owo aahikkhalana waamini mpakha okhwa.

Ninniisoona ottittimiheya, ohiy'ula, naamukhweli awe okilaathi va. Owo aarina miyaakha mikavi okathi oronwaawe owoona Apwiya? Aarina miyaakha mikavi? [Munna Upshaw muthiyana onnaakhula—Mol.] Okhanle mpakha miyaakha miloko mithanu na miraru ni mithanu na mosa. [Munna Upshaw muthiyana onkhalela onamoona okhwa wawe.] Oronwe Wirimu wira akhale ni...Hiyo ninnixukhuru mwaha w'atthu aalupale, anakhotto aalupale a waamini.

Vano, ohiy'ula, ti, hiyo khanintthuna woopisihani. Nsana ohiyu naahoopisihani minuutu muloko sikina, saahala minuutu miloko miili wira ephiye ewoora yanamuloko. Hiyo voolimaleleya ninkhuma ewoora yaneethanu na xexe ni minuutu miloko miraru. Kinoophavela olakiherya yeeyo ohiy'ula. Miyo kaari... Miyo koorukunxa okhuma mitthaka saka s'eprofeta kinlaleyakaaka mapuro oohiyana-hiyana a elapo, otthikela miteko s'enamalaleya ehapari. Ni wa mitthaka iyo s'eprofeta, naamutthikela nikelelaka ohoolo. Nto vano othikila, ti yoolipa, ni enoorukunxa mu—muteko wothene.

Ni etthu eniirelaaka yeela: okhala wira nihiku nimosa, kirwaaka okhuma oCanada, osulu vakhani nno oMontana, oxaka voosisu omosa, Apwiya Yesu... Koosuwela wira eniiweya vootikiniha, masi kaarowa mukaaroni, nto etthu emosa khukivara murima. Kaahiiwa Nsu, voowiiweya ntoko siniwaanyu nawaka, niirale, "Nsina nanyu nilempwe vamwaako vale." Vano miyo khuweha, nto okathi weemenlyahu, Billy ni miyo, Pwiya Yesu khwira, "Mutthike naanaano, ni mpacerye elaleeryo ehapari ntoko nyuwo siirakaanyu."

Tivo miyo kiryaaka va ohiy'ula, okhala wira kinrowa otthikela-tho waaavekelela aretta. Yookhala ehantisi yoorakama ya yeeyo, ni kookupali wira nyuwo atthu a ifiita va, muniwa ifiita sahu, munnisuwela ehantisi ene. Miyo kiri-tho va wira kaavekelele aretta. Sookhala soovaha sinci-ene suulupale mwa Muluku. Muluku onoowerya orumeela khula emosa wa seiyo Owo onttthunaawe hiyo namutthuniherya-ru paahi. Owo ti Pwiya Muluku.

Ni vano, kimpavela ohi... ohiwiixaatherya matata atthu kawerya-ru osyaka, okhala wira, siiso, enkhala ntoko (khiva mulattu), masi enkhala ntoko mutthu, avonihiwa, eniiriwa, "Ahe, *Lexe ni lexe* ookiixaattherya matata." Munnona? Miyo—miyo enikisivela owoonani nyuwo omwiixatherya matata Yoowo paahi, mwa Kristu.

Niwoko naka ti, hiyo othene noosuwela ni Soolempwa, wira ovoniha wa Muluku woolipihiriwa khula mulipa-oowaamini. Eyo epantte—eyo epantte ya ohaawa wa Yesu: "Owo ohaaxeriwe soottheka sahu, makhwatta Awe t'anivoninhe. Ntoko Moise aathomeiyaawe enowa y'eporonse, siiso Mwaana a mutthu ohaana ovenxiwa." Niwoko nimosaru.

Nto eyo yaari ethooneryo, Kristu ti mooniheryo. Vano nto vakhala—vakhala wira elivelo ya khalayi yaaniwerya okumiherya ovonihiwa, khivaatempa wira ele esya, erina itthu sooreeraxa, okumiherya ovoniha wa Muluku.

Vano, Yesu aavenxeriwe niwoko nimosaru enowa y'eporonse yaathomeiwale aya (Owo aapakiwe etampi): okhala wira, enowa yaapakiwe ya eporonse, ni *eporonse* "ethooneryo ya olamula wa

omuluku”; ni *enowa*, yooniheryaka “otakhalihwa wa enowa” okhuma omatta wEdeni, weiwo yaakenle-wo etampi ni eretta.

Ni Yesu khokhanle...Khaavo okhanle omulaleeryaka Yesu Kristu ntoko ettipihelo ahilaleenrye ovoniha wa Muluku. Khaavo okhanle olaleyaka Ehapari yooreera ahilaleiye ovoniha wa Muluku. Okhala wira, moone, nyuwo khamu...owo aahaana...khasintthuneya itthu kamosa-kamosa. Ntoko wira mwaamunama aamoovarani, khamurina othikilaka nnawo nawe, wala othikila mo—moonono awe wala etthu p’itthu owo oovaranne-aweni. Mmwiive paahi vamuruni munoomukhalana.

Ni ti siiso Yesu iiralyawe okathi Owo—okathi Owo okhwenlyawe etampi: Owo iivale sothene etampi yiiralyaya, Owo oonivuluxa voomalela. Vano ninaakhela e—elivelo ya yawihu yuulupale...musurukhu wa neemexeryo wa ovuluxiwa wahu woomalela woorwaani Wawe emaara ekina.

Tivo, moone, volulukama eretta e—entannyiwa ni etampi. Ookhala otthenke. Khiyaakhanle hata eretta mpakha okhala etampi. Vano nto okathi etampi ekenlyaya, eretta yaahitthara. Eretta mukhalelo wa etampi. Vano nto, okathi Owo oivalyawe etampi, eyo yaahikuxa mikhalelo sothene ni yeeyo. Moone, yaahaana wira.

Vano, ninrowa osoma ohiy’ula nipuro nimosa na Yoolempwa.

Vekeekhai kootteeliwa murima okhalana-tho, ottuli waka va ohiy’ula, nikhuru naka nooreera n’axinna naari muthukumano yoowo voosiis’ula, ni kinnimoona, Munna Shakarian ottuli iwe, nave, ni anci-ene w’axipatthani aka, anci-ene aya. Nkireere otteeliwa murima okhala ni nyuwo axinna va ohiy’ula. Mukivekelele vano, xontte.

Vano, nrowe nikhunle mwa Yoolempwa, wa yoosoma yaamukhaani paahi, Apwiya yatthuna vale.

² Ni muupuwele, meelo ohiyu, waavekelela-tho aretta. Nto vano kaalavulaka...Nwiriyaneyane, atthu othene aphavele wira ela, muhiwehererye etthu khata wiiraneya. Etthu ya nyuwo wira, omwaamini Muluku naanaano va. Mmwaamini Yoowo naanaano va! Munnona?

³ Vano sinnikhalaka mithinto sothene sa orumeyi. Muluku, mahiku ala ookiserya, kookupali, oonivaha sothene Owo orinaawe muLiivuruni mw’Awe. Itthu sothene Owo ohimaly’awe, hiyo nihoona, nave nlelo enkhala ntoko atthu khanwerya ovara. Ale atthokiheriwe ovara, anoovara; yaawo paahi. Ennimukhalaha oochoona mmosa; entthukula maithe a mukina.

⁴ Muupuwele, hiyo ninnaamini wira Yesu Kristu mmosaru nsana, olelo, ni mahiku othene. Owo khokhwiye, masi mukumi voohimala. Ni Owo ori vaava ohiy’ula. Hiyo nri Ohoolo Wawe, ohiy’ula, ni Owo ori vaava wira amulipiherye ni ammaliherye khula natiri Owo omulapenle-awe nihiku nla. Ni Owo mmosaru

nsana, olelo, ni mahiku othene. Tivo, etthu p'itthu Owo aaryawe, Owo ti yeeyo, ohiy'ula. Tivo nrowe nimwaamini Yoowo vano, okathi onsomaahu Masu Awe ni olavula sa Yoowo, minuutu muloko ni mithanu, miloko miili sinttharelana.

⁵ Maphattuvelo, kapiitulu 22, versiikulu 7 ni 8, vaavo vankuxaahu yoosoma.

Vano Isakhi aahilavula ni Abrahamu tiithi awe, khwira, Tiithi: nto owo khwira, Miyo Va, mwan'aka. Nto owo khwira, Ola va mooro ni ikhuni: masi mwapwittipwitthi onrowaahu ompaha mukuttho ori woowi?

Abrahamu aahaakhula wira, Mwan'aka, Muluku onoonvaherya mmansawe mwaapwittipwitthi wo ompaha mukuttho: nto oowaili aya yaanirowasa vamosa.

⁶ Pwiya Yesu, mureerihe Masu Anyu, Awo ehithike siiyo, masi ipyo simorele vatthayani enrowa waaruuwela woopowa ale amphavela, soopiili mw'erutthuni ni muroohoni. Hiyo niniivahererya wa Nyuwo; muthukumano, ewiriyanelo, Masu, yoosoma, yoohimya. Erooho Yoowaarya ekuxe omutthu ahu, wira nimooone Yesu Kristu. Amen.

⁷ Kintthuna kilavule minuutu vakhani sinttharelana vano mwaha wa: *Ephiro Evaheriwe Ni Muluku Wa Nihiku Nla.*

⁸ Muluku kweekwe onnikhalanaka ephiro. Siri iphiro piili, eyo ti wii, iphiro sahu wala iphiro Sawe. Muluku ookhalana ephiro y'olelo, okhala wira Owo okathi wothene onnipakaka ephiro ya itthu sothene. Muluku, wopaceryani, aanisuwela emalelo, tivo Owo ovahenryawe Yoolempwa Awe wa khula okathi. Nto okathi ene yoowo, yaaphiyaka . . . Vano muhivonye woona yeela. Okathi owo, waaphiyaka, voolimaleleya muteko onkhala wootepanyeya ni ismu, ni sikina, ni ilimalelo, mpakha okhala imiilya imilyawu sene ottaiwene wa Masu.

⁹ Vano nto Muluku kweekwe onimuruma mutthu vanlakani, profeta. Nto profeta ola . . . Muluku khonrukunxa mweetthiheryo Awe. Owo khonarukunxeke iphiro Sawe. Owo kweekwe oniira enamuna emosaru. Owo kweekwe t'oniiraawe; Owo ohaana wira okathi ula. Nto, mwa yeela, Muluku onvara muteko ni onnilipiherya Masu awo. Ntoko silavunlyaka ni nyuwo nsana ohiyu, Muluku apakaka otaphulela Wawe mwaneene. Muluku khommutthuna hata mutthu wira ataphulele Masu Awe. Owo ontaphulela Mmansawe, alipiheryaka Yaawo, akhalihaka Yaawo eekeekhai. Nto okathi Muluku onihimyaawe wira Owo onimwiira etthu, vano Owo onimwiira, khuuvo-tho ohoverya mwa yeeyo. Ti siiso Owo oniiraawe.

¹⁰ Tivo Muluku onnipakela ephiro. Muluku onnaaphenta an'Awe. Owo onnaaphenta atthu Awe. Owo onthuna waakhaliherya. Owo onnitthuna wookhaliheryani vanci-

ene ovikana sintthunaanyu mukhaliheryo. Nyuwo mwawerya-ru paahi waakhela eyo mmurimani mwanyu, wira Muluku onnitthunaxa wookhaliheryani ovikana sintthunaanyu wiikhaliherya. Masi Owo ohaana ephiro, ni eyo ti ephiro emosa paahi Owo onrowaawe ovara muteko enkhala ni ephiro Awe. Muhaana orwa mwa sootthuneya Sawe, kahi sootthuneya sanyu. Sootthuneya sawe! Nyuwo muntthuna eyo enamuna khata, masi Owo—Owo onoovahani ntoko Owo sintthunaawe.

¹¹ Ntoko Nahamani apwinaka m—m—mmaasini mwa Yordani. Vano, owo aahimnye wira maasi elapo awe yaari ooreera saana ni vooreerela, masi eyo khiyaari ile profeta aahimnye awe. “Mpwine va.” Owo aahipwiniha emaara emosa, maretta nlelo yaari vaavale; imaara thanu na mosa, nlelo yaari vaavale. Owo aahaana wiiwelela ni orwa ephiro ya Muluku. Nto vaiwelenle-awe voomalela enamuna ya Muluku, maretta yaahikhuma.

¹² Nto miyo kinihimya, ohiy’ula, wira hiyo naiwelela-ru ephiro yoovaheriwa ni Muluku, maretta anookhuma, eretta enookhuma, itthu sothene sinookhuma, masi nihaana orwa nittharaka ephiro Awe ya nihiku nla. Vano, opwina muYoradani khuwaarowa oreerela etthu olelo; eyo yaari ya Nahamani. Ikano saari sa—sa aYuta. Mahala ankhala ni Kristu.

¹³ Masi khula okathi wookhalana epantte aya ya Ehapari yooreera yoohimmwa khalayi ene. Bibilia ola ti wisuupulula woomalela wa Yesu Kristu. Ohikhaleke owaacereriwa-Mo etthu, nnakhala ehikumiheweke-Mo etthu; mutthu oniira t’otakhaliwa. Khanikhanle waacereryaka hat’etthu mwa Yaawo, okumiha etthu mwa Yaawo. Nihaana oweha Mu ni wona etthu elaiheriwe okathi ula, vano nto wona eniiraneya. Owo ti Muluku ataphulelaka Masu Awe Mwaneene. Okathi Awo yiiralyaya, “Mwali harusi onoorupala,” owo aahirupala. Iwo p’utaphulela wa Muluku wa Yaawo. Ele Owo onlaiheryaawe, yeeyo Owo onniira.

¹⁴ Vano hiyo ninnoona wira Muluku khonrukunxa iyeettihelo Sawe so wira itthu. Owo okathi wothene oniira volikana. Hiyo ninoorukunuwa voohimala okhala wira ninnimala. Ninniira mithinto sothene sa soovonya, ni ninniweriya opakaxa ni okhala vooreerela. Masi Muluku t’ohimala. Otthuna wawe woopacerya ti wooloka voomalela okathi wothene. Owo khokhanle okhalaka oosuwelaxa. Owo ti e...Owo ti ephattuwelo ya osuwela wothene. Owo ti osuwela wothene. Owo ti oweriya wothene, oowerya sothene, onikhala mapuro othene, oosuwela-sothene, ni oohimala. Tivo, Owo aahimya etthu, munepa anyu olipaneke Yeeyo, okhala wira ekeekhaii.

¹⁵ Vano ikereja kamosa-kamosa siniira, “Nave hiyo khinnaamini *Ila*, ni ninaamini *ele*.” Muluku khonrowa olamula o—olumwenku ni ekereja. Owo onlamula ni Yesu Kristu, ni Yesu ti Masu. Owo onrowa olamula ekereja ni Masu.

¹⁶ Nto vakhala wira *Ola* ti wisuupulula wa Yesu Kristu wa okathi wothene, ni wa okathi ula, Owo ohuupulula mBibiliani mu etthu Owo aarowaawe wira okathi ula; nto noonaka Eyo wiiraneya, naamoonaka Owo wira etthu Owo aalaihenryawe wira. Kahi oyariwa ni harusi; eyo yaari miyaakha ikonto piili sivinre. Masi etthu Owo aalaihenryawe wira olelo, etthu Owo aahimnye awe wira aamwiira olelo, ti yeeyo Owo okhanlyawe olelo.

¹⁷ Imaara sinci-ene, atthu aniira, “Ahe, miyo nkinaamini *Eyo*.” Ahe, nyuwo mookhalana-tho mutaphuleli a Hawa; onkuxa paahi epantte ya Yaawo, masi kahi othene Aya.

¹⁸ Tivo nintthuna nuupuwele wira Muluku kweekwe onkhala mmosaru. Masu Awe, ni etthu Owo onihimnye, Owo onimwiira.

¹⁹ Enooniherya wira Owo khonrukunuwa. Mwa Maphattuwelo 1, Owo iirale, “Khula epyo ekumiheryeke ntoko muxovo aya. Khula epyo ekumiheryeke ntoko muxovo aya.” Ni vaava va, ninniphwanya etthu vale enaamana anamapwaha othene. Khivanweryaneya opattuxaka-tho itthu. Mukuxe ntoko ekhavalalo ni—ni—ni puuru, mwaakumanihe, munkhalana muula, masi muula khonwerya oyara khukhalana muula mukina. Emmalela vaavo vo. “Khula epyo ntoko muxovo aya.” Awo anoowerya otholiha, masi enoorukunuwa otthikela-tho yaaryaya, enooniherya wira khempwaha siiso. Nnari, mulopwana. Emmalela vaavale vene. Munooowerya okumaniha enyewe ni etthu ekina, vamosa, n’ukumiherya ekhoovi, masi khimunwerya otthikelihya eyo okhala enyewe. Nnari mulopwana. Munooowerya omwiimiha nakhuwo ootakanxiwa; masi mwamwala nakhuwo yoowo ootakanxiwa, khamunkhalana etthu. Muhaana otthikela mmutakanxaka muxovo khula okathi. Okhala wira, Muluku iirale, “Khula epyo ekumiheryeke ntoko muxovo aya.”

²⁰ Nto vano, otakanxa mixovo sa itthu, nkawehani vatthu olumwenku ophiyalyaya-vo olelo. Miyo kaamusoma artiiku mmosa nno, a *Reader’s Digest*, vaavo, “Miyaakha miloko miili okhuma vano, athiyana ahinrowaaya okhalana aana, yatthikelaruru siiso. Awo anlya yolya yootakanxiwa mixovo.” Etthu ene okhala wira, awo arootakanxa mixovo, ni kahi siiso mutthu opakiwaawe, wira olyeeke muthinto yoowo wa yoolya. Epakiwe wira okumanane... ahiiso olyeeke enamuna epattuxiwaaya. Mwaha wa yeeyo, olelo, vahinweryaneyaaya osuka enama ni sothene siri ntoko siryaaya, okhala wira ti sootakanxiwa mixovo, soolima sootakanxiwa mixovo, nto, oh, khula ya khula muthinto. Sothene ti sootakanxiwa tu. Yoophiyerya nipuro nloko nothene n’atthu ninhononiwaya ni soowiira saya, mwaha wo ophavelaka okuxa etthu Muluku opanke awe saana, ni orukunxa ni opaka enamuna ekina, enamuna aya yaawo. Muhiye siiso Muluku opanke awe!

²¹ Hata yoophiyerya nipuro awo amphavelaaya otakanxa mixovo ikereja, olelo; okhuma opatiiso w'ekeekhai wa Erooho Yoowaarya, mwa ovahana matata; enamuna emosa yo omiseriwa, wa opatiiso wa mmaasini. Oh, wulu! Etthu yothene ti yootakanxiwa mixovo. Hiyo ninthuna nithike.

²² Mwiri wo otakanxiwa muxovo, muhaana weepesa ni otathela murette, ni owoomola axiitthu ni apirikixa-mavi mwa yoowo. Masi kahi mwiri wooloka mukumi; owo ti wooturuwa, woolipa, axiitthu khanwela. Ohaana yoophiyerya mwa yoowo wira omoopopihe mwaaxiitthu.

²³ Ni ti siiso muKristu ooloka! Nyuwo khamurina yo omweepesa, ni omukwata, ni omuleela *ela, ele*, wala *ekina*. Owo ookhalana etthu mwa yoowo, opatiiso wa Erooho Yoowaarya, enaatutuxa othene akina. Khamurina onvaraka metto, okhala wira owo mwiri wooloka wa Muluku. Owo ookhalana etthu mwa yoowo enwana ekhotto. muKristu onniwanela khula esentiimetru ya etthaya oneemelaawe-vo. Owo ohaana wira yeeyo, aawehereryaka-ru okhala. Ni, airaka siiso, yookhala Etthu mwa yoowo emmukhapelela.

²⁴ Hawa aaphavenle otakanxa Masu, wopaceryani. Muluku aahimuleela, "Nihiku ninrowaanyu olya, nihiku nenlo munookhwa." Owo aaphavela okumaniha Eyo ni osuwela Satana aanvahalyawe. Nto vairalyawe siiso, owo aahipwetexa nloko nothene n'atthu, vaavale vale, wa xetwani, okathi owo ophavenlyawe otakanxa Masu a Muluku oohihoniniwa ni osuwela.

²⁵ Eyo khenkhuma mwa osuwela wa Masu, enrwa ni owerya wa Erooho Yoowaarya! "Kahi ni ikuru, ni owerya, masi ni Erooho Aka," anihimya t'Apwiya. Ti siiso Muluku oniiraawe. Masu a Muluku ti Epyo ya Ekumi Ehinimala.

²⁶ Nyuwo mweererya-ru otakanxa Yaawo, munrowa wira exeeni? Munimwiisiiva mmansinyu ni Yeeyo. Khenrowa ovara etthu. Khenrowa otakanxana ntoko makhura ni maasi ahitonko aya otakanxana. Khenrowa wira.

²⁷ Awo khanatoko, mwa okathi wothene, aaphavela ophwanya etthu eri yooreera ovikana ephiro ya Muluku yo wira yeeyo. Moosuwela, awo khanaphwanyeke enamuna, yooreerela, wira mwalyakhu ayariwe molumwenkuni mu, woohikhala othorola nikosi nawe. Mwaahisuwela yeeyo? Awo khanatoko ophwanya enamuna yooreerela. Mwaamukhaani owo oniyariwa ni ephula yaamukhaani wookiseryani wa yawawe—wookiseryani wa munupi awe. Nto munupi owo mukhaani orinaawe, ti woovara-no muteko ni owaka, owaka nno ni iwe, mpakha okeliha muru awe, onookumiha muru awe, onophwanya ephiro yo okhumela ota. Eyo ephiro evaheriwe ni Muluku. Nyuwo mwamukumiha-ru munikosini mmo, enoomwiiva. Owo khonrowa okhala mukumi

nyuwo mwamukumiharu munikosini. Owo ohaana orwa ni ephiro ya Muluku.

²⁸ Eyo t'eniireya n'aKristu olelo. Ninamwaattikitthela esaphawu vooweepesa, ni waavaha matata ni waakeliha ni mwiitiho, ni waatakanxa mukereja. Etthu enaatthuna altaari a mavekelo a enamuna ya khalayi vaavo anvekelaaya-vo, mpakha akhanlyaya orumeeliwaka, akeleke mwa ephiro yoovaheriwa ni Muluku, mpakha aniitaphulaaya wa olumwenku. Mulattu ene, olelo, awo anihela nsina naya muliivuruni ni wiitakaniha mukereja, nto ti yeeyo tu. Masi ephiro ya Muluku, enamuna evaheriwe, okhala vale ni otthukuwa ephiro, mpakha Muluku woovahani Oyariwa vasya. Eyo ekeekhahi voolikana. Omukumiha vale, munoomwiiva.

²⁹ Eyo t'eniireya, olelo, n'atthu. Oyariwa vasya, othene aya anoohuluwa. Awo khonaasivela. Oh, awo arimwakakhanya etthu ni Oyariwa vasya, "murwe va mwaamini, nto ti yeeyo tu murinaanyu wira." Xetwani ene, onnaamini, ni moosuwela wira owo khoyariwe vasya. Wookhala Oyariwa vasya. Yookhala etthu enrowa ni yoowo, ti yoohilikana, yo ohisivela wa olumwenku.

³⁰ Khula oyariwa ti woottakatta. Nkincala nipuro xeeni. Wakhala munikhomani mwa ikuluwe, wala—wala exipiritaali. Oyariwa ti woottakatta.

³¹ Siiso ti Oyariwa vasya! Onoowiirihani wira itthu mwahuupuwelelanyu wira mwaamwiira. Onimookokhorihani waltaari nno ni wunla, okhuwela, orapiha wiipintari wiitho wanyu, ovenxa matata, omuttottopela Muluku, olavula ilavulelo, ni inamuna sothene sa itthu. Oyariwa vasya onimwiira yeeyo okhala wira ti ephiro evaheriwe ni Muluku ya oyariwa vasya.

³² Muhaana okhwa. Muhaana okhwa muhinatthi oyariwa-tho. Khula epyo ehaana okhwa ehinatthi oyariwa-tho. Voohikhala wira animookhwa, enkhala meekhaaya. Mutthu ohaana okhwa wa muupuwelo awe yoowo. Owo ohaana okhwa wa khula muupuwelo ohikhanle Masu a Muluku, ni orwa ephiro Awe. Vo ti vapuwani wa Muluku. Hiyo khaninkumana ni Yoowo voothariha miyuupuwelo sahu; ninkumana ni Yoowo mwa ele Owo ohimmyawe wira niire. Eyo ti ephiro yoovaheriwa ni Muluku wa yeeyo. Atthu anoohuluwa; awo khanthuna. Masi eyo ekeekhahi, vamosaru. Eyo eno, enooruua okhwa, ni muhaana okhwa, okhwa wa muupuwelo anyu.

³³ "Ahe, miyo koosuwela wira Bibilia onnihimya, masi nkinwerya osuwela saana." Vano mukhale vaavo mpakha Muluku wuupulula. Ti yeeyo. Ehaana . . . Iwo Oyariwa vasya.

³⁴ Marattha ni marattha a mmuro, khanaphwanyeke enamuna yooreerela orowa Okuusini, woohikhala othukumana toko. Ni ti siiso. Munimoona awo othene othukumana ni anoorwa mmansaya, muthinto mmosa wa esimu enimwaathukumanya, ni anookhalasa vamosa ni okumana ehinatthi ovava, ehinatthi

orowasa Okuusini. Exeeni iyo? Owo okathi wa muhakalaliho, okathi awo othene anthukumanaaya vamosa. Mootoko wiiwa oretteha siiso mookhalaru, ntoko wiiwa marattha awo a mmuro othukumana, wala marattha ale? Miyo kiira kihinatoko wiiwa etthu ene eyo! Ni awo ahaana...Khiyaavo enamuna, ekina yooreerela awo wira.

³⁵ Imaara sinci-ene, iwe mutakhwani wa Onkela epheyo, kinooweha waapaceryaka okathi wooriirya, oCanada. Nikoto na marattha ninooyariwa vaavale vantthiyani vale, awo khanakhumeke vantthiyani vale, mwaamukhaani ola khonakhumeke. Nto naanaanoru, ettheke yooriirya enimoorwa okhuma Onkela epheyo. Nrattha naamukhaani, naamukhaani nla, nlo nniyariwa muhooleli, ninookhuma vale variyari va ntthiya nle, ninoovenxerya munupi aya mukhaani osulu, khureetteha vaara vaxexe wala vathanu, nto khula nrattha vantthiyani ninrwa mpakha yoowo. Vano nlo ninoovenya vale, ni orowa olukama wene oLouisiana ntoko sinweryaawe orowa, mmatta wa musoro.

³⁶ Mwaha wa xeeni? Awo khanatoko ophwanya enamuna yooreerela owo orowa iwe. Nyuwo khimukhanle waatakanxaka vamosa. Mwaahela m'wehilini ya alyakhu ni...ehili, nto mwaarohe mukamiyawuni iwe. Nrattha nle nihaana muupuwelo wooloka. Nto mwamuhela m'wehilini ya alyakhu, wira mmuroihe iwe, owo onnisuwela wira onroihiwa oniiviwa inama. Eyo ekeekhaii volikana. Owo onrowa ephiro evaheriwe ni Muluku.

³⁷ Ti yeeyo mutthu aarinaawe wiiraka olelo, kahi othukumanyiwa ni ehili ya muromolelo. Masi ovolowa ephiro Muluku ohimmye awe wira nvolowe, ni patiiso wa Erooho Yoowaarya ni Oyariwa vasya, muhakalaliho mwa nikoto. Kahi wiitakanxa ekereja, murowaka mukhora ni mukhora, ni mukawaka irevista; woohikhala Oyariwa, muyariwaka vasya, oosareya Erooho Yoowaarya, ephiro ya Muluku, mwiitaphulaka wa olumwenku. Ekeekhai! Mwaaminiki Masu a Muluku! Okathi woophiya. Ti yeeyo entthuneya hiyo waamini.

³⁸ Mutthu, nyuwo khamunkhalakhala nweryaka...Miyo nkincala atthu akavi aneererya orowa vantthiyani vo ni wira, "Vano nwehererye minuutu mmosa, nyuwo marattha maxikhaani, kihaana etthu yo wooleelani. Nihaana nrattha noosoma va. Owo orina Ph.D. ni LL.D. Kinimooleelani, owo onniwerya wooholeelani."

³⁹ Marattha awo aahaana akhili ooloka. Ayo, mulopwana. Awo khancaliwa ni osoma wawe wooloka, enakhaleru exeeni. Awo anniwerya osuwela oretteha owo oniiraawe. Esimu eyo. Oh, wulu! Ekereja yaahaana mano osuwela yeeyo ya Masu a Muluku!

⁴⁰ Nlo nsu khata noohisuwanyeya. Bibilia ohimmye wira, Paulo ohimmye wira, "Nlope narumiha nsu noohisuwanyeya, t'ani

onwerya wiilikanyiherya ekhotto?” Ti yeeyo, ekereja—ekereja yaavaha nsu noohisuwanyeya na “wiitakanxa.”

⁴¹ Muluku iirale, “Oyariwa!” Etthu oyariwa wiiralyaya iwe, Oyariwa oniira siiso olelo, okhala wira Yesu Kristu mmosaru nsana, olelo, ni mahiku othene. Etthu Owo aaryawe okathi ule, Owo ti yeeyo olelo. Etthu awo yiiralyaya okathi ule, ti yeeyo hiyo eniiraahu olelo. Enamuna awo yaakhelanse aya Eyo iwe, ti yeeyo awo aniiraaya olelo. Etthu emosaru awo arinaaya olelo, ti yeeyo awo yaarinasaaya ottuli wu. Vakhala wira Eyo ennirwa, Eyo enrowa orwa siiso. Ti siiso, ephiro evaheriwe ni Muluku. Eyo khenrukunuwa.

⁴² Marattha khanrukunuwa. Awo anoothukumana othene, khula mwaakha, orowa onkela epheyo, okuusini, ni khula nipuro anrowaaya. Awo anoothukumana toko.

⁴³ Ti siiso Muluku oniiraawe. Owo onveeleliha Masu Awe mwa okathi aya, okathi owo, nto Awo animooniheriwa. Ni nkincala itthu kavi sikina siniiraneya; awo yoona-ru Masu a Muluku yaalaiheriwe nihiku nenlo, alipihewiwa ni olaiheriwa, khiyaavo etthu enrowa oweemexa. “Mwali harusi onoorupala.” Nto awo vairalyaya. . .

⁴⁴ “Apwiya Muluku ahu anoomuthanla Profeta onlikana ni miyo,” Moise aahihimya.

⁴⁵ Nto okathi awo amoonalyaya Mulopwan’ola orwa ni wira itthu Owo siiralyawe, awo yaahisuwela wira ole aari Mesiya. Filipe voonalyawe eyo wiiriwa, owo iirale, “Nyuwo mwa Kristu. Nyuwo mwa Mwene a Isarayeli.” Owo aahisuwela okhala wira Masu yaahilaiherya, ni yaahikhalana ekumi nihiku nenle. Voochicala aFarisi akavi, aSatukhi, yaaphwanyaneya vakhiviru, Matotori a Divindad, eyo khiyaamweemenxe hata vakhani, okhala wira owo aaphavela ethoonnyeryo yeeyo. Okathi woonalyawe wiiriwa, ele yaari ethoonnyeryo ya okathi. Ti yeeyo awo yaaphavelaaya, ephiro ya Muluku yoovaheriwa. Ayo, mulopwana.

⁴⁶ Vano khivaaweryaneya ovaha nrattha, osoma. Nlo khinaarowa owerya wira. Nlo khinaarowa otthuna. Marattha makina khayaarowa otthara nlo, hata khivaacala ikharawu khavi aarowaawe ohimya wira ohaana. “Vano, nkawehani va, koorowa oxikola ya marattha. Kinnisuwela sothene sa yeeyo. Koomaliha osoma. Kinnisuwela itthu iya sothene.” Khiyaarowa oreerela etthu. Khinaavo hata nimosa wa marattha ale naarowa omutthara, yakhala-ru marattha ooloka, amen, okhala wira awo anwehererya ethoonnyeryo khata. Awo yoonaru ethoonnyeryo eyo, awo annaamini.

⁴⁷ Nto vakhala wira nrattha nookhalana enamuna y’osuwela eyo, ankhi muKristu ooyariwa vasya? Hiyo nihaana omusuwela Yesu Kristu mwa owerya wa ohihimuwa Wawe. Ekeekhai. Muluku onniira ni ephiro evaheriwe ni Muluku.

⁴⁸ Muupuwele, osoma khuwaarowa okhala ekaruma yo oweetiherya nipuro noovaheriwa ni Muluku. Ekaruma awo arinasaaya esimu. Ni awo, marattha ale, annisuwela wira esimu ile enimwaaroiha nipuro nivaheriwe ni Muluku.

⁴⁹ Ni siiso Erooho Yoowaarya enniroiha Ekereja nipuro nivaheriwe ni Muluku. Kahi wiitakaniha ekereja, masi wira musarihiwe ni Mukhalelo Awe, wira moone Masu Awe wooniheriwa, olipiherya. Eyo ti ephiro Muluku ovahenryawe ekereja, kweekwe, w'atthu, wira yaaruhe nipuro Muluku ovahenryawe wa yaawo. Vekeekhai ti yeeyo ekereja yaarinaaya okhalaka olelo. Vano, hiyo noosuwela wira eyo ekeekhai.

⁵⁰ Khiyaavo enamuna yooreerela e...Khenaphwanyawe enamuna yooreerela ya mwaana ophwanya ele entthunaawe ohikhanle wunlela. Mwaanvahale ettiwi, mwiira, "Junior, murina mahiku mararu paahi muyariwanyu, masi vano mwaatthunaka, mwaatthunaka esuupha anyu, nvenxe ettiwi ila murumihe," moone sinto enoovara muteko. Khenvara etthu. Mwaana oninlela etthu onthunaawe. Ti ephiro evaheriwe ni Muluku. Vaninlaxaanyu...Muhimmane mwaamukhaani owo, owo onthara paahi ephiro evaheriwe ni Muluku. Owo onthuna etthu. Ti yeeyo. Eyo t'inamuna emosa paahi owo onsuwelaawe owiithana ame awe; okhuwela mwaha wa yeeyo, wunlela yeeyo. Ti yeeyo.

⁵¹ Muluku onaatumererya yeela an'Awe. Muluku onaatumererya yeela an'Awe anaamini. Owo aahiira. Kahi olavula wa akhili, kahi teyoloxiia khata muulupale, teyoloxiia wira oxuttihiwe. Owo onthuna wira munlele sintthunanyu. Ni eri saana, munlele yeeyo! Mwakhala oolipaxa ni ooturuwa, khimunkhalakhala mwaakhelaka. Mwalikana-ru wira mwiitaphule vakhani, ni wunla, Muluku onimoovahani. Owo omusivela owiwa an'Awe wunla. Munlele sintthunanyu wa Muluku! Muluku onnitthuna. Eyo ti ephiro Awe evaheriwe. Munlele! Ti siiso mwaana oninlaawe; ti siiso Owo onthunawe wira nyuwo munle.

"Wunla mpakha liini?"

⁵² Mwaana oninla mpakha okathi xeeni? Mpakha owo osivelihiwa. Ni ti siiso muKristu oowaamini orinaawe wiiraka, mwaana a Muluku. Moona wira Muluku oommana natiri, muhooceye, munle mpakha waakhuliwa. Munle mpakha mmoone Muluku olipiherya Masu Awe. Okathi Muluku onlipiheryaawe Masu Awe, ni onooniheryaawe wira ari vaava, weeso khamurina wunlaka-tho; munimwaakhela, mweette mmuxukhuru Yoowo mwaha wa yeeyo. Mpakha wiiraneya, mukhuwele mpakha mwaakhele. Okisivela eyo, nanthiti, ovareleleka.

⁵³ Kahi mwiri wootakanxiwa muxovo, kahi ole orina weepesiwaka waavaaveriwa, ni oroihiwa nno ni nno. aKristu ti

martiiku eekeekhai, ooloka, ooyariwa, a Muluku. Awo anwanela opuro aya, ni anoowana mpakha omala elapo ela ya vathi. Khula mweettiho ekhotto.

⁵⁴ Muluku aahimuhimeerya Moise wira Owo aahinvaha muttethe. Owo aahimuleela Yoxuwa, “Khula nipuro nnawo, wala vathi va nnawo nanyu, ninnyakelaya, Miyo kihoovahani.” Awo yaahaana owanela khula esentiimetru ya yeeyo. Siiso hiyo ninniwanela khula esentiimeturu ya yeeyo. Kehiyo etthu yo weepesiwa ni waavaaveriwa, ni sothene siiso, ni wira, “Ahe, kinimoorihani iwe, koone enuupuwelelanyu. Nvahe muupuwelo anyu.” Eyo kehiyo enamuna yo orwa.

⁵⁵ Murwe ni eminyalelo. Murwe wira munrowa okhala vaavale mpakha ophwanya. Mukhale vaavale mpakha Muluku waakhula ni olipiherya. Mutthu onimwaamini Muluku, onniwerya woona Mukhalelo wa Muluku, woona Mukhalelo wa Muluku, osuwela Mukhalelo wa Muluku, ni osuwela wira Owo ori vaava. Owo ori vaava wira aakhule itthu sothene Owo omulampenle awe natiri nihiku nla. Nto, munle mpakha nyuwo mwaakhele! Munvarelele Yoowo. Muhikhume, vakhala wira muhaana okhala othana n’uhuyu. Muluku khonthuna wira an’Awe yiiwelele s’otthokelela s’akhili. Owo onthuna wira awo avekelele Yeeyo, mpakha natiri olipiheriwa.

⁵⁶ Abrahamu va aanithuna mukuttho. Exeeni yiiraneeye? Muluku aahinvaha mwapwittipwitthi. Eyo yaari enamuna yoovaheriwa ni Muluku. Owo aaniphavela mukuttho, tivo Muluku aavahenryawe. Ohoolo waya, owo aaitthanne nipuro nlo *Yehova-Yire*, “Apwiya anoovaherya Mmansaya mukuttho.”

⁵⁷ Vano, Yobi, emaara emosa, profeta a khalayi, Yobi. Owo aari profeta. Owo aarookela mmikattyamihoni. Satana aarootthuna omweererya, nto khimuruuhela ithuku. Ni aahaakuxa an’awe, aahikuxa mihuwo sawe, aahikuxa sothene owo aarinaawe, ni khimuruuhela ithuku.

⁵⁸ Nto alipa-oomukurunuxa murima khurwa, awo yiirale exeeni? Awo khiyaanvahale etthu woohikhala omuthanya, yaarompaca, emuleelaka wira, “Vano, nyuwo murimwiira etampi, wiiphiini.”

⁵⁹ Nto Yobi khukhala oolipa paahi. Owo aahivekela. Owo aahikupali wira aanithhara sooruma sa Muluku. Owo aahiira voolikana ele Muluku aalaihenryawe wira. Etthu Muluku aamulaihenryawe, wira Owo aarowa omweemererya yoowo, vathi va mukuttho woopahiwa, ni owo aahikhala vaavale.

⁶⁰ Tivo, Muluku aahinvaha yoowoona. Owo aari profeta. Owo oonale exeeni? Owo oonale Masu, Yesu Kristu. Owo khwira, “Miyo koosuwela wira Nvuluxa aka ookhala. Nto mahiku ookiserya, Owo onoovenya mulaponi. Hata axiitthu epwetexaka erutthu ila, nlelo n’erutthu aka kinoomoona Muluku.” Moone, Owo aahinvaherya yoowoona ya ohihimuwa.

Owo aryeene profeta, aahoona Masu. Owo aahoona Masu ni aahisuwela wira makhuva awe ni erutthu awe saamuhihimuwa nihiku nookiserya. Aahikohiwa sinto aanisuwela vatthu Muluku aaryaawe, vakhala wira owo aaniwerya paahi woona.

⁶¹ Owo khwira, “Ethutu yakhwa, ennivenya-tho; mwiri wamora, onnivenya-tho; masi mutthu onimummaathi khuvahererya erooho, onoomalamala, ori vayi? O vaakhanle wira Nyuwo mwaahikihela mmahiye, ni okittukuttherya nipuro noowiipitheya mpakha oviruwa Wanyu omala.”

⁶² Vano itari saahipacerya oruma, overunya khupacerya ophanima, Erooho y’Apwiya khumurweela profeta. Vano owo khuvenya, khoona Orwa w’Apwiya, nto owo khukhuwela, “Miyo koosuwela wira Nvuluxa aka ookhala, ni mahiku ookiserya Owo onoovenya mulaponi. Hata axiitthu epwetexaka erutthu ila, ni erutthu aka kinoomoona Muluku.” Muluku aahivaherya Masu, Yesu Kristu, nto owo aahimoona Owo ni khumwiitthana Owo Nvuluxa awe.

⁶³ Isarayeli aanitthuna ephiro yo okhuma wEjitu, nto Muluku khwaavaha profeta, profeta aalipihenrye Masu yaalaiheriwe Abrahamu. Vekeekhai, ephiro yoovaheriwa ni Muluku! Awo khayaawerya omwiiniha nikuruta surtaatu, awo khayaawerya wira *ela*, awo khayaawerya wira *ele*. Etthu emosa paahi awo yiiralyaya waari olipelela ephiro yoovaheriwa ni Muluku. Ni Owo aahihimya, wira, “Owo aamwaakumiha atthu awo, nuuvira miyaakha imiya xexe. Atthu awe yaamukhala mw’epothhani, masi Owo aamurowa waakumiha ni ntata na ikuru. Owo aamurowa wooniherya ithooneryo Sawe ni sootikiniha, ni aamphwanya ovuwa elapo yeele.”

⁶⁴ Va aarwa mulopwana ene, okathi awo yaavekenlyaya, khuvekela! Nto vano muupuwele, wunla wothene khuwaarowa waavuluxa, mpakha okathi owo omaliheriwa.

⁶⁵ Itthu iya sinoonaahu olelo, khisaakhanle wiiraneyaka miyaakha miloko miili sivinre, wala miyaakha miloko mixexe sivinre. Ti olelo siniiraneyaya. Ela ti ewoora! Ola p’ukathi! Naanaano p’ukathi simmaliheriwaaya. Mwaha wa xeeni? Muluku aahilaiherya, nto ela eri va.

⁶⁶ Awo yaahihimya, miyaakha emiya sivinre, wira, “Opatiiso wa Erooho Yoowaarya khivaaweryaneya wiiraneyatho.” Awo yaahihimya, miyaakha miloko mithanu sivinre, “Erooho Yoowaarya...” Masi nyuwo atthu aPentekosite mwaahiwooniherya, wira yaari ewoora ya Muluku omwarexa Erooho Yoowaarya. Voohicala ele aMetotista, aPatista, maPrespiteriyaano, aLuteraano yaahimye aya, nyuwo mwaahikhala oratta-ene ni Masu a Muluku. Atthu oominyala yaahikhuma-wo khukhala oolipa mpakha opatiiso wa Erooho Yoowaarya orwa, ni yaahilavula ilavulelo ni onvuwiha Muluku. Khaavo aakhanle wooleelakani voovirikana. Muluku ti

mutaphuleli Awe Mwaneene; nyuwo muhaakhela. Khino nyuwo khamunwerya otaphulela, masi moosuwela wira muhaakhela. Taani onwerya omutaphulela Muluku? Khaavo onwerya.

⁶⁷ Nkinwerya wooleelani moota Muluku onweryawe wooniherya yoowoona, masi koosuwela wira enniiraneya. Nkinwerya woota moota Muluku onweryawe wira itthu iya. Kahi mwaha aka otaphulela. Owo ookhala, onkhala meekhaawe. Owo ti Elohim, Ole oomalela mwa sothene. Miyo ka murumeyi Awe paahi. Koosuwela wira Owo oolaiherya, ni koosuwela wira eri vaava. Eyo etthu kinsuwelaaka. Miyo koosuwela eyo, wira Owo mmosaru nsana, olelo, ni mahiku othene. Koosuwela wira Owo oolaiherya yeela, ni Muluku ori vaava wira ammaliherye natiri Awe. Ayo. Ephiro yoovaheriwa ni Muluku!

⁶⁸ Isarayeli aahivahiwa profeta, aalipihenrye Masu, vano awo khukumihwa. Profeta ola, Moise, aahikhala miyaakha sinci-ene mothakoni, miyaakha miloko mixexe, awanaka ni atthu ala, aphavelaka waakhalana mpakha owerya waaroiha muttethe wa natiri. Vaahiphiyerya okathi, mulopwan'owo aarinaawe okhwa; owo aarina miyaakha emiya ni miloko miili. Khinaakhanle nipuro wira owo akhwe. Valikanne-awe wira akhwe, Muluku aanvanhe Mwala; Mwala owo aamanne awe mothakoni, Mwala waatthanre awo, awo yaawunryaya-vo. Muluku aanvanhe Mwala, nipuro n'okhwa-vo, vaavo Moise aakhanlyawe okhwaaka okhwa voophwanelela.

⁶⁹ Vamwala va, Muluku, mukihiye kikhwe Vamwala vaavo! Ti vaavo ontthunaaka wira. Mwala owo aari Kristu Yesu. Ayo, mulopwana.

⁷⁰ Vakhwiye awe, Vamwala vaavo, owo aanaatthuna anamakuxa ekaxawu. Muluku khunveeleliherya nikhuru na Malaikha. Xeeni ohikhala nikhuru na ahumu awe? Okhala wira khaavo aawerya omuroiha nipuro owo aarowaawe woohikhala Malaikha. Awo ti yaamukunxe omuroiha ohoolo wa Muluku, owo aanaatthuna anamakuxa ekaxawu nto Muluku aahivaherya. Owo aaronwe ovira ephiro yoovaheriwa ni Muluku. Aleluya!

⁷¹ Enokhi aaheetta miyaakha imiya thanu ni Muluku, ni aahimusiveliha Yoowo. Owo aanitthuna ephiro yuulupale wira arowe Owaani. Muluku khuvaherya.

⁷² Eliya aahimutakhaliha Yesapeli mwaha wo wiitho wawe woopintariwa, ni enamuna aakhalinhe awe atthu yiiraka. Ni owo aahooceya ni aahimalamala, ni aahalela orowa Owaani. Owo khaareere wuuluvala vaamurikelaawe omulapuwa Yordani; Muluku khuvaherya ephiro wira owo amulapuwe Yordani. Owo aatthuna owela Wirimu, wira akumane ni Muluku; Muluku khuveleeliha ekaaro ya mooro, ni ikhavalalo, nto khunvenxa. Ephiro yoovaheriwa ni Muluku. Ephiro yoovaheriwa

ni Muluku. Owo okathi wothene oniira voolikana. Ekeekhai. Ayo, mulopwana. Muluku onnivaherya ephiro, kweekwe. Ayo.

⁷³ Asuweli, okathi yaattharaya ephiro akhumaka oPapilooniya, awo yaahoonu ephiro yaatthunaya orowa, okhala wira awo yaanisuwela wira Mwene ola aarowa oyariwa. Awo yaanithuna epusula; Muluku aavahenrye Ettheneeri. Awo yaahihiyasa itthu sothene sikina ottuli. Awo khayaatthuna ipusula; awo yaatthara Ettheneeri. Yaari ephiro yoovaheriwa ni Muluku. Muluku aahivaherya ephiro, awo yaahitharasa Ettheneeri mpakha ophwanya Waarya woolikana voomalela. Oh!

⁷⁴ Olumwenku waamutthuna Moopoli, nihiku nimosa. Awo yaahirimeela; awo khayaasuwela. Awo yuupuwela wira yaahoopowa, masi yaanimutthuna Moopoli. Muluku khunvaherya Mwaana, ntoko Moopoli. Mwaha wa xeeni? Khaavo-tho mukina aawerya wira. Khaakhanle hata mutthu elapo ya vathi, nnakhala mutthu Wirimu, hata nipuro, aawerya wira. Muluku aahimukhuruwela mwali harusi, owo aahirupala khimuyara Mwaana a Mutthu. Nto Mwaan'owo khaari muYuta wala Mmalapo. Owo aari Muluku, owooniheriwa mw'erutthuni, Mmosa paahi aawerya ovuluxa. Ephome Awe enninoopola. Ephome Awe enninivoniha. Ti Ephome yeeyo ekhanlyahu olipaka, wa khula natiri Owo omuhimalyawe. Muluku oolaiherya wira.

⁷⁵ Muluku onkumana ni mulipa-ookokhorela paahi mwa Ephome, ni vathi v'Ephome. Isarayeli aarina nipuro nimosa wira akumane ni Muluku. Kahi va . . . Muluku ookhalana Nipuro nimosa, olelo, vaavo Owo—Owo onkumanaawe ni mulipa-ookokhorela; kahi Metotista, Patista, wala Pentekosite. Owo onkumana ni yaawo vathi v'Ephome. Nlo ti nipuro nimosa paahi nivaheriwe Muluku orinaawe; kahi mmutthenkesoni, kahi moowiiraanani. Masi Mphomeni ti vatthu Yesu Kristu onkumanaawe ni mulipa-ookokhorela Awe. "Miyu koonaru Ephome!" Eyo ti ephiro evaheriwe ni Muluku.

⁷⁶ Vaamanlyaya ekereja okupalihiwa voomalela, okathi awo amoonalyaya Owo, wira Owo aari Mesiya!

⁷⁷ Okathi mwaamuthiyana veehimeni, okathi waamutthunawe Moopoli, owo aaphavela etthu wira ooniherye. Owo aahikhala mukereja ni sothene sikina, ni awo yaahoonu eyaaminelo ela ni eyaaminelo ele, mpakha, okhala namuttompe. Eyo yaahimuroiha mphironi. Nihiku nimosa, owo aarowa orika mucoma mmosa wa maasi, ntoko ewoora yanamuloko n'emosi othana, nto vale aakilaanthe Mulopwana; muYuta mmosa va, vamooneiloni na mwaamukhaani. Nto owo khwira . . .

⁷⁸ Varonwe awe okuruxa mucoma awe vapoliani, wira arike maasi, owo aahimwiiwa Mulopwana mmosa wira, "Muthiyana, mukiruuhele maasi kiwurye." Nto owo khwira . . .

79 Owo khurukunuwa naanaanoru, ni uupuwelaka wira Owo aari muYuta pure, maana Owo aari mutthu paahi vamihimmwa erutthu. Owo aari Mutthu; aanilya, aaniwurya, aanirupa, ntoko siniiraahu. Owo aarixa mutthu vaakhanlyawe okhwaaka, nnakhala vo Owo aari Muluku. Vano hiyo ninnoona wira, okathi. . .

80 Khwira “Khanilimalenle nyuwo aYuta waavekela aSamariya itthu ntoko yeeyo.”

81 Owo khwira, “Masi mwaamusuwenle Ole onlavulanaanyu, mwaamukivekela Miyo maasi.” Khwira, “Rowani mwaakuxe ai’y’anyu murwaase vaava.”

Owo khwira, “Miyo nkirina ai’y’aka.”

82 Khwira, “Moohimya ekeekhai. Mwaahikhalana athanu, nto ole munkhalanaanyu vano kahiyo awinyu.” Exeeni yiiraneieye? Muluku aahivaherya etthu wa yoowo.

83 Owo khwira, “Napwiya, kinoona wira Nyuwo mwa Profeta. Hiyo noosuwela wira Mesiya arwa vale, Owo onoonileela itthu iya. Ti yeeyo Owo onrowaawe wira. Masu anihimya siiso. Hiyo ninwehererya yeeyo. Kootemwa ni kihooceya n’itthu sothene iya, iyaaminelo saya n’itthu, aFarisi, aSatukhi, ni a Heroti, khula etthu yaakhanle okhalaka. Masi hiyo noosuwela wira Mesiya onimoorwa, okathi Owo onrwaawe. Nyuwo munihimya exeeni wa yeeyo?”

84 Owo khwira, “Miyo ka Yoowo.” Amen! Muluku aahivaherya ephiro. Owo aahihiya muno, muthiyana oorukunxiwa, khutthimaka arowaka opooma, khwira, “Murwe, mmoone Mulopwana mmosa Yoowo okihimenrye itthu kiiralyaka. Kahi yoola Mesiya?”

85 Petru, awiriyanaaka soohimya sa Antere, ni aahiwiriyana imaara sinci-ene, aahimwiiwa Antere olavula mwaha wa Yohani amusuwelihaka Mesiya, ni Mulopwana mmosa, ni itthu sothene iya siiraneyaka. Sothene saari mwiiriirya wa Petru. Masi nihiku nimosa owo aahirwa ni Antere, wira amoone Yesu. Nto vaphiyalyawe Ohoolo wa Yesu, Yesu khunweha, nto Owo khwira, “Nsina nanyu mwa Simoni, ni nyuwo mwa mwaana a Yona.” Muluku aahivaherya ephiro ya Petru wona Ole Owo aaryawe. Owo aari Mesiya yoole.

86 Vano hiyo ninnoona wira, nuumala Yesu okhwa, khuwela Wirimu, Ekereja yaaniphavela Owerya, wira ekhaleleke onamoona. Muluku khwaavaha Pentekosite. Owo aanvahenrye Pentekosite.

87 Miyaakha ikonto piili soovira, apatthani. Miyaakha ikonto piili soovira. Mahiku ala ookiserya, hiyo noophiyerya nipuro, mutthu okenlyawe muyeettiheryoni ya oKristu ni oohononatho Yeeyo, ootakanxasa ni iyaaminelo, ikereja, miromolelo, soolavula s’akhili, mpakha Owerya ni etthu y’ekeekhai ya

Ehapani yooreera ya Kristu voowiira erimeenlyaya. Nto hiyo nri wa ni Masu alaiheriwe mahiku ala ookiserya, etthu enrowa okhumelela, etthu enrowa wiiraneya; mutthu khonaamini Iyo. Awo aroohiya Eyo. Nyuwo munimwaakoha vakhala wira aKristuu; aniira, “Kiniira mpannta wa *lexe ni lexe*.” Eyo khenihimya etthu. Nyuwo muhaana okhala muKristu mwaha wo oyariwa. Vano hiyo nookhalana-tho etthu yothene Papilooniya, sivinryaya miyaakha ikonto piili.

⁸⁸ Ekereja olelo ennitthuna Owerya ni Ekeekhai, emaara ekina. Oh! Muluku oonvenxa Mwan’Awe, wira ela ekhapeleliwe, okhala wira Owo ohimmye wira, “Woohala okathi vakhani olumwenku khunrowa okoona-tho; masi nyuwo munookoona, maana Miyo kinookhala ni nyuwo, hata mwa nyuwo.” Hiyo ninnoona wira, mwa aHeperi 13:8, “Owo mmosaru nsana, olelo, ni mahiku othene.”

⁸⁹ Hiyo ninnoona, mwa Malakhiya 4, wira Owo oonilaiherya Mutthaka mahiku ookiserya, wira “aamuhokoloxerya Waamini w’atthu w’axitiithi emaara ekina.” Owo aahilaiherya, mahiku ookiserya.

⁹⁰ Owo oolaiherya-tho, mwa Yohani 14:12, “Ole onikaamini Miyo, miteko sinvaraaka nave-tho owo onoovara. Hata soovikana iya, wala suulupalexa ovikana iya, onoovara, maana Miyo kinrowa w’Atithi Aka.”

⁹¹ Owo aamulavula nihiku nimosa. Awo yiirale, “Mwiixuttihi, munoonihe ethoonyeryo.”

⁹² Owo khwira, “Nloko nootteettheya ni nooraruwa nimphavela ethoonyeryo.” Nlo ti nloko hiyo ninkhalaahu olelo. Owo iirale, “Ni Miyo kinimwaavaha ethoonyeryo. Maana ntoko Yona saakhanlyawe mmirimani mwa nankumi, mahiku mararu othana n’uhiyu, siiso Mwaana a mutthu ohaana okhala mmurimani mwa etthaya, mahiku mararu othana n’uhiyu.”

⁹³ Muthinto xeeni wa ethoonyeryo nloko nootakhala ni nooraruwa naarowaaya ophwanya? Ethoonyeryo ya ohihimuwa. Ni ti yeeyo hiyo nilaiheriwaahu olelo, ethoonyeryo ya ohihimuwa wira Owo nlelo mukumi, Owo mmosaru nsana, olelo, ni mahiku othene.

⁹⁴ Owo iirale, “Ntoko saaryaya mahiku a Lothi,” ntoko soonalyahu nsana ohiyu. “Mahiku a Lothi, etthu yaakhumelenle mahiku a Lothi, siiso yaamukhala orwa wa Mwaana a mutthu.” Itthu iya hiyo noolaiheriwa, Soolempwa sinci-ene sikina. Wira nihikuxe okathi. . . “Woohala okathi vakhani olumwenku khunrowa okoona-tho. *Kosmos*, ‘ekhalelo, okathi wa ekereja,’ awo khanrowa okoona-tho Miyo. Nave nyuwo munookoona, maana Miyo kinookhala ni nyuwo, hata mwa nyuwo, mpakha omala okathi.” “Yesu Kristu mmosaru nsana, olelo, ni mahiku othene.” Exeeni iyo? Eyo ethoonyeryo yoovaheriwa ni Muluku, ephirowa evaheriwe ni Muluku.

⁹⁵ Abrahamu anwehereryaka mwaana. Ethooneryo yookiserya owo oonalyawe ohinatthi okhala opwetexiwa w'Amalapo, aari Muluku owiisooniherya mw'erutthuni ya mutthu, aasuwenle isiiri sa mmurimani mwa Saara okathi waaryawe muheemani. Yesu ohimmye wira, "Eyo enimwiireya-tho orwa wa Mwaana a mutthu." Munna mulopwana, muthiyana, kookupali wira ninkhala nihiku nenlo. Kookupali wira nla nihiku na natiri.

⁹⁶ Muhaana okhalana waamini mwa etthu eniiraanyu. Mwaahikhalane waamini, vakhala-ru wira munkuxa vowaakanyerya paahi...Nuulumo *waakanyerya*, voolikana ni Webster, nnihimya, "ohimya pure muhirina okhulupale." Masi Masu yalaiherya-ru, ni Muluku khunalipiherya Masu awo, nyuwo khamunaakanyerya-tho. Nyuwo muniira voolikana ele Muluku ohimmyawe wira mwiire, ni Owo ohaana olipiherya Yeeyo.

⁹⁷ Mu—mulipa a muhakalaliho muulupale oosuweliwa, miyaakha sinci-ene sivinre, kaamoonale okathi waaryaka mwanamwane, aari Paul Rader. Owo aahithariha ehantisi emosa, nihiku nimosa, kweekwe enkhalaka ni miyo. Owo iirale, "Nihiku nimosa, hiyo naathaya ikhuni." Owo aari nakhuni, oRegon, ni khuhimya wira mukhulupale aaroomulela wira owele vantumuxani. Owo aamuloha. Vaaryaawe-vo tthiri, okathi owo, owo aari musisironi; ni khumphwanya ehooma, yooviha saana, nto aamookhwa. Khurweliwa tothoro, masi waari imiilya imiilya sene orakama-wo, ni nikula.

⁹⁸ Tothoro ohinatthi ophiya vale, Paulo khupacerya olamwa, atepaka owereiwa. Owo khumwiihana mwaar'awe oororomeleya. Owo khwira, "Oophentiwa, onooriipela okatthi, oriiipelaxa, onookhuveelaxa." Nto owo khutthikela otupha.

⁹⁹ Nto vaireiyaaya, owo ohimmye wira aarooloha, okathi waatumphe awe, wira mukhulupale awe aaroomuruma wuuha mwiri. Owo khuphwanya mwiri, khumoroxa mwiri owo, khuhererya epaso vaavo, ni khurowa wira avenxe. Owo khaawerya ovenxa. Khwira wira ikuru sawe saahimalala. Owo khaawerya ovenxa tu. Owo khwira, "Ni wunnuwa wa mwiri ole, vekeekhai kinoowerya ovenxa. Mukihiye keehererye-tho." nto owo khuurama khuvexa, owo khwiilipiha mpakha okhulumuwa. Owo khukilaathi epantte ya mwiri, khwira, "Nkinsuwela tu enrowaaka wira. Mukhulupale onthuna mwiri ula iwe opuwani, ni miyo nkireere okhulumuwa wira kiroihe weiwe."

¹⁰⁰ Khwira owo aahiiwa Nsu noomaaleleya owo ahaatonko awe wiiwa, aari mukhulupale awe aalavunle; masi khwira, okathi owo orukununwe awe wira amoone ole aari mukhulupale awe, aari Pwiya Yesu. Owo khwira, "Paul, munwanelani? Mukhalenle-ni oowuukhuwaxa? Munnoona maasi

awo ankhwalala vale?” Khwira, “Muhinrihelela-ni ntto mmurathini, nwela murowaka? Owela mpakha opuwani.”

¹⁰¹ Owo khutuphela vantthoroni khupacerya okhuruwela aviraka vasulu va mawipi, akhuwelaka voviituperya. “Miyo kineettiha vasulu vaya! Miyo kineettiha vasulu vaya!”

¹⁰² Munna mulopwana, muthiyana, Yesu Kristu oolaiherya itthu iya okhumelela mahiku ookiserya. Kinnaamini wira ninkhala vaava. Kinnaamini wira Owo mmosaru nsana, olelo, ni mahiku othene. Nkisuwenle moota yiraneie aya, masi miyo kineettiha mwa Yeeyo. Miyo kinnaamini wira Eyo Ekeekhaii, okhala wira Eyo Ehapari yooreera, ephiro yoovaheriwa ni Muluku. Kinnaamini wira Owo Mutthaka w’okathi, okathi onkhalaahu. Ti ephiro evaheriwe ni Muluku. Miyo kineettiha mwa Yoowo!

Khamunthhuna owela ni miyo, nuuramihaka muru ahu?

¹⁰³ Tithi a Wirimu, hiyo nineettiha nirowaka Movuwani vasulu va Masu Anyu. Hiyo ninnaamini wira Masu Anyu ti Ekeekhai. O Muluku, khula mulopwana ni muthiyana, ohiy’ula, awele vasulu va Masu, ni yuupuwele, okathi aniiraaya arowaka mmukwahani, awo anoowerya ohimya, “Miyo kineettiha vasulu va natiri a Muluku. Onookiroiha olukama Movuwani. Eyo ti enamuna yoovaheriwa ni Muluku olelo. ‘Yesu Kristu mmosaru nsana, olelo, ni mahiku othene.’”

¹⁰⁴ Nyuwo muhimmye wira, “Okathi vakhani olumwenku khunrowa okoona-tho, masi nyuwo munookoona; maana Miyo kinookhala ni nyuwo, hata mwa nyuwo.” Nyuwo moonilaiherya, Pwiya, hiyo wira naamuwoonani.

¹⁰⁵ Akereku yaahirwa, emaara emosa, khwira, “Mwaatthu, naaphavela omoona Yesu.” Vano yaavahiwa mureerelo owo. Ni ohiy’ula, Pwiya, hiyo nintthuna niwooneni Nyuwo, nave. Ti otthuna wa murima ahu. Khaavo onwerya owiiwani Nyuwo, voohikhala wira onootthuna owoonani. Nto vakhala wira aKreku ala yaahitthuniheriwa owoonani Nyuwo, ni Nyuwo moovaherya ephiro ya hiyo owoononani Nyuwo, Nyuwo kweekwe munnivaherya ephiro okhala wira Nyuwo mwa mmosaru nsana, olelo, ni mahiku othene. Murumeyi mmosa ahaaruha aKreku ala Ohoolo Wanyu, nto yaahiweriya owoonani. Munivahe oreeriwa omosaru ohiy’ula, Tithi. Wira hiyo, ntoko arumeyi, niruuhe muthukuman’ola Ohoolo Wanyu. Ni wira niwerye omoona Yesu, ohiy’ula, Yoowo okhanle mmosaru nsana, olelo, ni mahiku othene. Munivahe, Pwiya.

¹⁰⁶ Nwoopole ale oorimeela, Pwiya, akhala mulopwana, muthiyana, mmiravo, wala mwaaruusi. Noonaka elapo yoonononeyaxa ni anamwiiva ni anakhirime, ni oopahuwa, ni woona ohononeya wa elapo olelo! Ni noonaka ohononeya wa ikereja, ni woona seettaka orowa wiiviwa iwo ekumeeniku iwe, okhala wira awo khanrowa ephiro yoovaheriwa ni Muluku! Awo anrowa ephiro ya eyaaminelo ohiya orwa ni Masu.

¹⁰⁷ Muluku, hiyo ninvekela wira aKristu eekeekhai, ooloka, ooyariwa, ntoko koonihenrye aka, mwaha wo okhala marattha eekeekhai, awo... "Ipwittipwitthi Saka sinniiwa Nsu Naka, oohimusuwela iyo khasimmutthara." Pwiya, Nsu Nanyu ti Masu. Eyo kweekwe enkhalaka ephiro Anyu yoovaheriwa Ekereja ni w'atthu, ti Masu Anyu. "Masu Anyu ti Ekeekhai." Ni Nyuwo mwa Masu. Ni Bibilia onninihimeerya, "Masu a Muluku t'otepaxa wiitha onvikana xoowa oniitha ninno-ninno, annilamula miyuupuwelo ni sintthunaaya murima."

¹⁰⁸ Isarayeli ahaaweryenle-ni omoona Mesiya aya, okathi awo yoonalyaya wira Owo aari Masu yaale, okathi Owo aaweryawe olamula miyuupuwelo saari mmurimani mwaya? Yahaaweryenle-ni? Awo yaasuwenle mwaha wa maprofeta, okhala wira maprofeta yaahiwerya; masi okathi omalela wa Muluku okhalihwaaya mwa Mwan'Awe, ni Owo aakhala eriyari ahu, vano awo yaahivonya woona okhala wira yaahikhalihwa oohoona.

¹⁰⁹ Pwiya, ale arina maitho aya ootthukuwa, ohiy'ula, nimoone Yesu eriyari ahu. Wira khula mutthu onwereiwa avonihiwe. Ela emaliherye, Pwiya, wira awo ahikhalakhale-tho, nnakhala, okhuma okathi ula mpakha ohoolo... masi yaamini paahi wira Nyuwo mwa Mesiya. Awo anoorwa ephiro ya Muluku. Anciene a awo ari vaava, ohiy'ula, anookhwa. Aakhala anci-ene va, ohiy'ula, alakela ahinrowa okhala va esumana emosa okhuma olelo, Nyuwo, mukhaliheryo Anyu waahirwe.

¹¹⁰ Vano, Tithi, Nyuwo paahi ti munkhapelela etthu Nyuwo mulaihenryanyu. Masi Nyuwo moolaiherya wira naamuwoonani. Nyuwo moohimya wira etthu Nyuwo mwiiralyaanyu ni hiyo naamwiira. Ola p'ukathi. Miyo koolapa; miyo kinnaamini. Koowiiwani Nyuwo ohimya siiso; Masu Anyu annihimya siiso. Nyuwo munnilipiherya. Koosuwela wira eekeekhai. Vano esuweliwe, Pwiya. Yolempwa, vano yiiraneye, mwaha wa Omwene wa Muluku. Amen.

¹¹¹ Nkikupanli wira ninrowa wiithana eliinya ya mavekelo. Kookupali wira kinoorumeela vaava va.

¹¹² Akavi a nyuwo anwereiwa? Vano nyuwo munookhala... Nyuwo munvarela ntata nanyu, mukhalelaka onamoona wira munniwereiwa.

¹¹³ Akavi a nyuwo anrowa okhalela onamoona etthu emosaru, "Munna Branham, miyo vekeekhai nkooponwe"? Munnitthuna ovenxa ntata, "Mukivekelele"? Muluku ooreeriheni, nyuwo. Ti yooreera. Eyo ti... Muluku ooreeriheni. "Miyo nkooponwe."

¹¹⁴ Vano, nyuwo nvenxale matata anyu, ni nyuwo muhivenxale, "Masi, Munna Branham, vekeekhai kinnitthuna woopowa. Murima aka. Miyo kinnaamini wira khehanle etthu wa hata mutthu molumwenkuni." Exeeni-tho, exeeni mwaakhanlyanyu oophwanyaka, yaarowa okhala yuulupalexa ovikana

woopowa wanyu? “Mukivekelele. Kintthuna koopowe.” Munnitthuna ovenxa ntata, mpaani mothene, mapuro othene, “Kintthuna . . .”?

¹¹⁵ Akavi a nyuwo muhaakhenle Erooho Yoowaarya, mwiire, “Koosuwela wira kihaana waakhela Yeeyo”? Nvenxe matata. “Miyo nkirina; kinnnitthuna.” Vaareera, aakhala anci-ene ahirina.

¹¹⁶ Vano, Kristu onnimaliherya Masu Awe, ni muhaana olipiherya omwaamini wanyu Yoowo. Owo ti Masu. Vano, aHeperi kapiitulu 4, ahimnye wira, “Masu a Muluku,” yoowo okhanle Kristu. Kristu ti Masu. Nyuwo othene munnisuwela yeeyo? Mwiire, “Amen.” [Muthukumano oniira, “Amen.”—Mol.] Owo ti Masu, “mmosaru nsana, olelo, ni mahiku othene.” Ethhu Owo aaryawe mwa Moise, Owo aahikhala-tho mwa Eliya; ethhu Owo aaryawe mwa Eliya, Owo aahikhala mwa Yohani; ethhu Owo aaryawe mwa Yohani, Owo aahiimaleliha Mmansawe mwa—mwa Yesu. Ni olelo Owo mmosaru ntoko Owo saaryawe okathi ule, ni Awo nlelo Masu a Muluku oolaleeriwa a nihiku, yeeyo emmukhaliha Owo Waarya ommwaleela ni onlipiherya Masu a natiri.

¹¹⁷ Hiyo nri okathi wa wookiseryani, apatthani. Yesu ori vaava. Koosuwela wira muhiwa yeeyo.

¹¹⁸ Ankhi mwahaatonko woona, mookhalaru, ni mwahaatonko okhalana moonelo wa woona, nnakhala mutthu, masi imaara kamosa-akamosa mwaakhalana moonelo wa oviha? Nto miyo kaakhalanne woona, kaawerya woona, ni kooleelani wira nlo nsuwa. Nyuwo mwaamwiira, “Nkinsuwenle moota eniireyaaya, masi kihaana moonelo, ntoko oviha, vanniweryaneya okhalana moonelo.”

Miyo kaamwiira, “Nlo nsuwa.”

“Nsuwa exeenii?”

“Owo muthuko.”

“Muthuko exeenii?” Sothene saarowa okhala olumwenku musya wa nyuwo.

¹¹⁹ Masi ankhi koohimenryeni wira Yesu Kristu eemenle vaava naanaano va? Ankhi koohimenryeni wira Owo ori eriyari ahu? Owo oolaiherya. “Vanthukumanaya aili wala araru mwa Nsina Naka, Miyo kiri vaavo eriyari aya. Miyo kiri vaavo!” Vano eyo Ekeekhaii, wa miyo, *Ela* ti Ekeekhai yothene, ahiiso Eyo kehiyo Ekeekhai. *Ela* ti Yoolikana, ahiiso kehiyo yoolikana.

¹²⁰ Vano, vanihimmwa owoopolani, Owo iirale eyo okathi Owo okhwiyaawe oKalvario. Woovonihani, Owo ohiira eyo okathi Owo okhwiyaawe oKalvario. Nyuwo mwaamini. Masu ahimnye wira Owo ohiira.

¹²¹ Vano etthu emosa paahi Owo aakhanlyawe wiiraka, Owo eemenle-ru va ni—ni efaato yeela, Owo okivanhe awe, waarowa okhala paahi owooniheryani wira Owo aari Mesiya.

¹²² Kahi ni makhwatta a ipereku mmatatani mw'Awe. Khula namirima miili onoowerya wira yeeyo, ohela makhwatta a ipereku, ni ephome wiitho wawe, ni malepa ni itthu. Eyo enniweryaneya wiiriwa. Eyo ehiiraneya. Atthu anci-ene hata aakhomeliwa ntoko Yoowo. Kahi yeeyo.

¹²³ Masi Ekumi Awe, ele yaari mwa Yoowo! "Mwaana khonwerya wira etthu, Meekhaawe, masi ele Owo oniwoonaawe Atithi yiiraka." Eyo Ekumi, mwa Yoowo, yoonihenrye. Kahi mwaha wo wira Owo aari muYuta mwaamuthiyana veehimyeni aaminni awe wira Owo aari Mesiya; okhala wira Owo aaniwerya olamula miyuupuwelo mmurimani mw'awe, eyo yaahimukhaliha Mesiya. Vakhala wira eyo yaari enamuna Mesiya aaisuwelinhe awe Mmansawe mahiku avinre, eyo yaari ephiro Awe yoovaheriwa wira aisuwelihe Mmansawe. Eyo yaari ephiro Awe yaavaheriwe, voolikana ni Yoolempwa, ya okathi ula. Munnaamini yeeyo?

¹²⁴ Vano, khula mmosa a nyuwo va, miyo ka mmalapo. Koowehaweha, nkimmoona mutthu kimmusuwelaaka. Atthu othene mu, ahinkisuwela, ni ansuwela wira nkinsuwela etthu ya nyuwo, nvenxe matata. Tthiri, mapuro othene. Mutthu ola ommaathale vanrepani va, oovenxa ntata nawe. Owo khaakisuwela. Khaavo onkisuwela.

¹²⁵ Masi muupuwele, Muluku onnoosuwelani. Muluku onnoosuwelani. Vano, Owo ooniherya-ru wira ori vaava.

"Exeeni iyo, Munna Branham?" Eyo yoovahaa.

¹²⁶ Yoovaha exeeni? Yoovaha exeenii, khula enamuna? Kahi okuxa etthu ni orumeela, wira, "Kookhalana yoovaha ya ovoniha! Miyo kinnikhuma ni onvoniha *ola*, onvoniha *ole*." Vaakhanle wira kaaniwerya, tthiri kaamwiira. Vano, ti, masi, yoovaha, eyo, nyuwo mwa—nyuwo mwa, nyuwo muntaphulela voohiloka yoovaha, *yoovaha* paahi "wiikumiha nyuwo mphironi ni otthuniherya Erooho Yoowaarya woorumeelani." Munnona? Eyo ti yoovaha.

¹²⁷ Ti yeeyo murumeyi okhanlyawe. Owo khonlaleya etthu onttunaawe olaleya. Owo onimwiikumiha paahi mphironi, eyo ti yoovaha, ni muupuxeryo onoorwa, ni owo—owo onlavula ni muupuxeryo wa Erooho Yoowaarya. Khula yoovaha ekina ti enamuna emosaru. Vano, ni soovaha sa orumeyi, ni sikina, ti sinkhalakaaya. Soopacerya, ti soovaha, soovahiwa ni Muluku, ti, "voopacerya arummwa, maprofeta, awiixuttihi, amukukhula, ni anamalaleya ehapari." Iyo ti miteko. Iyo ti soovaha sahu.

¹²⁸ Vano, Yesu Kristu aahilaiherya wira aamwiira yeela mahiku ookiserya. Owo aira vale, Owo alaiherya yeeyo ni aira vale, akavi anrowa waamini ni omukupali Yoowo, ohii'ula? Nvenxe ntata,

mwiire, “Kinoomukupali.” Akavi mu nto . . . Kooxukhuru. Akavi mu ahinatoko okhala mmosa wa mithukumano khalayi, nvenxe matata. Wulu, ntoko nuusu n’atthu. Akavi anaamini, Owo ohinatthi wira, nyuwo munnaamini khula enamuna? Muluku ooreeriheni.

¹²⁹ Vano nkawehani. Vakhala wira kooleenleni Ekeekhai, Muluku ohaana okaakhula. Owo onimwiira. Owo onihela Masu Awe mwaano mwanyu nto Awo khunairaneya. Ti yeeyo, Awo Masu Awe, Awo ahaana wira. “Kooveleeliha Masu Aka, Awo khandthika siiyo.”

¹³⁰ Vano, vaakhanle wira kaaniwerya ovoniha, kaamwiira. Vekeekhai ntoko, Munna Upshaw oottittimiheya, okhwiye, hiyo naamuhimiyahu. Mulopwan’ole mutokweene okilaanthe-ene ottuli iwe vakhaterani vale, mulopwana mmosa oominyala, miyo kaamunvoniha vaakhanle wira kaaniwerya. Miyo kipacerya okhuma vaplataforma, voohithepya, nto kirukunuwa kimoona mwa yoowoona, kirowaka, keettaka. Khumwiihana, khumuhimeerya yaari exeeni, nto yaari yeeyo. Owo khuvenya khweetta, khurwa vaplataforma khukwannya ikatha sawe sa munawoni, vaamanlyawe okhala oorakala mwa miyaakha miloko mithanu na mosa ni mithanu na mosa. Munnona?

¹³¹ Ohiyu ene yoowo, muhano mmosa ooriipa, ni mwan’awe, iwe epante emosa. Miyo khwira, “Kinnimoona me—meetiku owanre ilumeta, ni—ni oomooperari mwanamwane muthiyana, ooripa, ni oroorakala mpakha vammilo.”

¹³² Muthiyana mmosa mmutokwene, vaanimurikela orwa vaplataforma. Owo khwira, “Pwiya, ikharari, owo mwan’aka!” Nto va owo aamurwa, nikhuru n’alipa-ookhaliherya hata khiyaawerya onvarelela.

¹³³ Miyo khwira, “Maathi, khivanreerela etthu owela va. Eyo kahi. . . Owo Mulukuu.” Miyo khwira, “Khenrowa ophwanyiha etthu orwa va. Mwaamini paahi.” Vano owo khukokhora khupacerya ovekela. Miyo khuwehaweha muthukumano khoona ntoko, nipuro noophunyeya, oviraka. Kimoona mwaamuthiyana mmosa ooriipa aarina mwaatteepea mmoononi mw’awe, aviraka nipuro noophunyeya. Nto kinweha mwaana mwaamuthiyana, ooriipa, kiweha ottuli, nto aari yoowo. Miyo khwira, “Ehaakhuliwa.” Owo khuvenya, ni khukhuma vanrepani. Munnona?

¹³⁴ Ti Muluku. Munnona? Ti Muluku. Munnona? Owo khokhanle. . . Khaavo onwerya ovoniha. Omwaamini wanyu Muluku.

¹³⁵ Vano, Bibilia ohimnye wira Owo Namukuttho Muulupale, naanaano va, onwerya onimorela ikharari mwaha wootteettheya wahu. Munnaamini yeeyo? Namukuttho Muulupale! Vano, vakhala wira Owo Namukuttho Muulupale, Owo aarowa wira

sayi? Vakhala wira Owo mmosaru nsana, olelo, ni mahiku othene, Owo aamwiira vamosaru nsana, olelo, ni mahiku othene.

¹³⁶ Vano nvekele, ni mutthuniherye Erooho Yoowaarya nto... Mmuleele Muluku, "Muluku, mulopwan'ola eemenle vale khonkisuwela, masi ele Owo onihimyawwe ehaana maana. Nyuwo mwa mmosaru. Nyuwo mwa Kristu. Kinoowereyiwa. Koothoiwa. Nto Nyuwo mwakihiyaru...Kaahikhalane waamini wira kiire, mmuthuniherye mutthu ommusuwelaaka akhalane waamini, ni muhiye...Nyuwo mwiihane ni mutthuniry—mutthuniherye—mukitthuniherye miyo wala mutthu yoowo okwanye nlaya Nanyu mwa Ovuwa. Vano vakhala wira mulopwan'owo ookhuma mphironi, vano Nyuwo murumeele eyano awe wira mwaakhule, ni mwiire voolikana ntoko Nyuwo siiralyanyu okathi waaryanyu elapo ya vathi. Miyo koosuwela wira Nyuwo mwa mmosaru nsana, olelo, ni mahiku othene."

Nrowe nuuramihe miru sahu vano.

¹³⁷ Pwiya Yesu, kikhumaka mwa elaleeryo ya ehapari okela muteko w'oprofeta, masi nnakhala vo miyo kinniwaaminini, Pwiya, Nyuwo moolaiherya. Ni kinvekela wira Nyuwo munivahe, ohiy'ula. Munivahe. Mukiiwe. Muthukumano ola waakhumaka va, ohiy'ula, nirowa owaani, niire ntoko ale yaakhuma Emawusi, "Mirima sahu khisaaniviha okathi Owo aalavulaawe ni hiyo mphironi?" Yesu aahihihimuwa mw'alipa-ookhwa; awo khiyaasuwele. Awo yaalavula ni Yoowo; awo khiyaasuwele. Masi okathi Owo aakelinhe awe mpaani, khuwala mukhora, nto Owo aahiira etthu ntoko Owo siiralyaawe ohinatthi okhomeliwa Wawe vamwiikimanyo. Eyo yaahitthukula maitho aya. Awo yaahoona wira aari Yoowo. Emaara ekina, Pwiya, mirima sahu sivihiwe naarowaka owaani ohiy'ula, ntoko sawaya. Maana hiyo noosuwele wira Nyuwo moolavula ni hiyo mphironi. Mwiire itthu, ohiy'ula, Nyuwo mwiiralyanyu okathi waaryanyu elapo ya vathi, maana Nyuwo mwa mmosaru nsana, olelo, ni mahiku othene. Hiyo ninvekela mwa Nsina na Yesu. Amen.

¹³⁸ Vano mukhale nvekelaka ni mwaamini paahi. Nrowe nivahererye epante *ela*, toko. Hata wira muri vayi, mpaani mu, mmwaamini Muluku. Kaatthuna wira atthu othene ekhale oottittimiha saana ni ekilaathi voomaala, evekele.

¹³⁹ Ela ti yoohiweryaneya mara. Kaalavula voosiis'ula, woolyaani wa voosiisu wa arumeyi, "yootikiniha." *Yootikiniha* ti yoohikupaleya, "etthu yoohikupaleya, masi nnakhala vo ekeekhai." Nyuwo moosuwele wira Erooho Yoowaarya yeemelaka va ni olavula etthu vamuthukumanoni vale, w'atthu kihinsuwelaaka, yaahaana wira ekhanle yootikiniha. Etthu ehinweryaneya oleeliheriwa. Nkisuwenle sintoko Owo onimwiira. Kinwehererya paahi wira Owo onimwiira, kiroromelaka wira Owo onimwiira.

140 Vano nvekele paahi, mwiire, “Pwiya Yesu, kintthuna kikwannye nlaya Nanyu, ni miyo—miyo koothoiwa. Miyo kinoomanelani natiri, Pwiya, miyo ki—miyo kinimoorumeelani Nyuwo ekumi aka yothene.” Muluku ontthuna wira murukunxe murima. Vakhala wira khamurukunxale murima; murukunxe murima, mwiire, “Kintthuna kirukunxe murima, Pwiya. Kintthuna wira Nyuwo mukivonihe. Miyo kintthuna wira Nyuwo mukireerihe. Mukivonihe naanaano Pwiya. Miyo ka murumeyi Anyu.”

141 Miyo kaarowa...Mookawa ittikitti sa mavekelo olelo? Kaarowa omukoha Billy paahi sinto...Aahikawe vale, kaamwiiwthuna eliinya ya mavekelo. Masi awo khakanwe ittikitti sa mavekelo olelo. Mukhale oottittimiha paahi, mwaamini.

142 Vano, mwa Nsina na Yesu Kristu, kinnikuxa khula erooho va vathi wo weetiherya waka, wa ovuwa wa Muluku, wira Masu Awe esuwelihiwe, wira Nihiku na Olamuliwa nihikhalane ntthawelo.

143 Vano nwehe epanth'ila, ni mwaamini vano. Nvekele ni murim'anyu wothene, ni nvekele paahi, ni voowiiyeviha, muhiwanane Eyo, mwiithyuuwe paahi, ni mwiire, “Pwiya, Nyuwo moommana natiri. Miyo kinniwaaminini.” Ti yeeyo erinaaka wira.

144 Koosuwela wira khivanthhunya miyo wookohani. Akavi atonko woona Waarya iwo? Nrowe noone. Nyuwo muhona elatarato Aya. Nrowe noone matat'anyu, ale atonko woona elatarato Aya. Khamunoona Yeeyo vaavale vale? Moone, mukhalelo mukina. Ori vasulu va muhan'owo.

145 Owo onihaaxeya ni mukattyamiho ni metto sawe ni muthana. Owo... Munnaamini wira Muluku onniwerya woovonihani, munna? Mukwannyale exeeni? Nyuwo khamunkisuwela, masi mookwannya Etthu. Apwiya Yesu yakileela-ru nyuwo mwa aani, enoowaaminihani oratteene? Nyuwo mwa Muhano Phillips. Yaari ekeekhai, nvenye mweemele. Vaareera. Miyo ka mmalapo voomalela wa nyuwo? Nvenxe ntata yaari ekeekhai. Miyo nkinatoko omoona owo kookhala-ru. Owo okwannyale exeeni? Murowe mwalavule ni muthiyana, nuumala. Soowereya sothene soomala vano. Nyuwo muri saana. Muroweke owaani mukhale mukumi.

146 Va ori muhano mmosa, ottuli wawe iwe. Owo onihaaxeya ni wuukhuleya. O Muluku, owo aahi... Nsina nawe ti Muhano Star. Mwaamini, Yesu Kristu onimoovonihani. Nvenye mweemele mwaakhele ovonihani wanyu. Kaari mmalapo wa nyuwo, muvele matata anyu. Wuukhuwa wanyu woomala. Yesu Kristu onnoovonihani.

147 Owo olaihenrye exeeni? Owo oolaiherya. Munnaamini?

148 Ookhala muhano mmosa ottuli wawe, okilaanthe vale. Owo onoovekela. Owo t'owuukhuwa, ookhalana mikattyamiho. Owo

ontthuna ohiya onvura sikaro. Nsina nawe ti Muhano Bordon. Nvenye, Muhano Bordon. Asikaro anyu aamala. Yesu Kristu onnoovonihani. Nkinatoko omoona muthiyan'owo kookhalaru.

¹⁴⁹ Munnaamini? Vano moosuwela wira nkinwerya wira eyo. Owo ti Yesu Kristu. Exeeni iyo? “Masu makumixa, ooweryaxa, onvikana xoowa oniitha ninno-ninno, anlamula miyuupuwelo ni sintthunaaya murima.” Awo Masu, Yesu Kristu mmosaru nsana, olelo, ni mahiku othene. Khamunwerya waamini yeeyo?

¹⁵⁰ Va, ookhala mulopwana mmosa okilaanthe va, orina mwaamukokho, eretta ya murima. Ti yeeyo. Miyo nkimmusuwela mulopwan'owo. Nkinatoko omoona. Masi owo murumeyii. Reverendu, Mwenye Kinsey. Ti yeeyo. Munnaamini, mulopwana? Nvenye mweemele mwaakhele ovonihiwa wanyu. Yesu Kristu onnoovonihani.

¹⁵¹ P'uhimya wene, mwaamukiirela exontte, muryeene murumeyi? Nwiixaatherye matata amwaar'inyu, awo anihaaxeya ni mukattyamiho wa isyo, ni mukattyamiho wa hapa, ni orulelaxa, ni mikattyamiho. Nwiixaatherye matata. Enoorowa waahiya, mwaamini-ru vale.

¹⁵² Mwiiwe, ookhala mulopwana mmosa okilaanthe ottuli wanyu, owo t'okhuneeliwa ni eruku ya mokhwani. Owo orina kankuru. Mulopwan'owo onihaaxeya ni muuwe, kankuru, eyuukhuwelo. Nsina nawe ti Mwenye Young. Mwaamini vano. Yesu Kristu onnoovonihani. Munnaamini yeeyo? Munnikupali yeeyo? Vaareera, mulopwana.

¹⁵³ Va ori mulopwana mmosa, ommaathale va vanrepani va. Mulopwana, nkinoosuwelani. Vaakhanle wira kaaniwerya woovonihani, kaamwiira. Miyo ka mmalapo wa nyuwo. Nyuwo muhoorwa mpakha va. Nyuwo muhiilipiha wira murwe va. Khamukhanle ovithaka etthu evonyeie mwa nyuwo; masi nkinwerya woovonihani. Nyuwo murwiiye va n'amwaar'inyu. Awo akilaanthe vale ni ekhasako ele ya ekoore ya peeseku. Ti yeeyo. Vaareera. Mulopwan'owo orina eruku ya mookhwaani; owo khokhanle okhalaka mukumi okathi munci-ene vano. Owo orina kankuru.

¹⁵⁴ Nyuwo munooahaaxeya, nave, murokor'aka. Munnaamini wira Muluku onniwerya okileela etthu enooahaaxani? Mukattyamiho anyu wa muthana. Ti yeeyo. Yaari ekeekhai, nvenye. Vaareera, mwaakhele openuwa wanyu. Mwaamini. Mwaapweherye ntata aiy'anyu.

¹⁵⁵ Munnaamini wira ka profeta Awe, mulopwana? Mwakhala-ru vaavo siiso, vekeekhai munookhwa. Khamukhanle okhalaka. Ti yeeyo tu. Mameetiku ahoohiyani. Kankuru ohookhuurani. Miyo kihoona myaha suulupale sowoovikanani sivonihiwe. Nkinwerya woovonihani. Masi nyuwo mwakupali-ru paahi ni waamini! Munnaamini yeeyo? Ola p'ukathi anyu mmosa paahi. Okathi anyu wookiserya onoovira. Munnaamini? Mwaaminiki

vale, nvenye vanrepani vo. Nvenye vo, mwa Nsina na Yesu Kristu! Nvenye mweemele ni mukhale mukumi, ni mukhume va mweettaka, munvuwihaka Muluku. Mutthu anvahe ntata vo, amukhaliherye. Ole vale, eemenle.

¹⁵⁶ Akavi mu anaamini? Nvenxe matata. Nvenye mweemele. Nyuwo akina muntthuna ovonihwa, nvenye, mwa Nsina na Yesu Kristu. Nvenxe matata, mmuttottopele Muluku. Mmuttottopele Yoowo ni munvuwihe. Vano mwaaxukhuru Apwiya mwaha w'ovonihwa wanyu, Yesu Kristu mmosaru nsana, olelo, ni mahiku othene!

¹⁵⁷ Munna, mameetiku aavonya. Ela ti ephiro evaheriwe ni Muluku. Mwaamini!

¹⁵⁸ Akavi antthuna okupali ephiro evaheriwe ni Muluku? Nvenxe matata mmuttottopele Muluku, khula mmosa a nyuwo, ni mwaamini wira moovonihwa, mwa Nsina na Yesu Kristu. Amen. 

64-0206E Ephiro Evaheriwe Ni Muluku Wa Nihiku Nla
Kern County Fairgrounds
Bakersfield, California wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org